

Eugene Kingsale ta bai di 1-0 den ultimo wega di temporada cu Padres y posibilidad ta grandi cu e lo regresa

SAN DIEGO- Porfin e pelotero Arubiano, Eugene Kingsale, a ricibi un bon oportunidad pa muestra su talento den un forma regular, como hungador di Liga Grandi.

Manager di San Diego Padres, esta Bruce Bochy, a gusta e mentalidad di Eugene y a permiti e hoben Arubiano hunga como regular, principalmente den rightfield pero tambe el a actua den center y leftfield.

Kingsale a termina e temporada cu averahe di .278 den 89 wega hunga, caminda el a aparece un ototal di 216 ocasion na plato, a produci 60 hit di cual 10 doblete, 3 triple y dos home run, mientras cu el a empuha un total di 28 careda.

Aki tin cu agrega cu Kingsale a ricibi un total di 20 boleto mientras cu el a poncha na 47 ocasion y na tres ocasion el a wordo golpia pa un lanzamiento, el a roba un total di 9 base mientras cu na dos ocaison el a ser saca out den intento di robo.

Fuera di e cifranan aki tin cu agrega cu Eugene a anota un total di 27 careda y tabatin un porcentahe di .346 di subi base.


Tabata e ultimo siman aki cu Eugene a cai den un slump na bate, caminda el a mira su averahe di batea cu tabata laba laba cu .300, bin cai te na su averahe final cu a bira di .278, asina mes un di e mihornan entre e regularnan di San Diego Padres.

Solamente Ryan Klesko e primera base tabatin un averahe net di .300, sigui pa Mark Kotsay centerfielder kende tabatin averahe di .298 mientras cu e tercera base Phil Nevin a termina cu averahe di .285, mihor cu Kingsale.

Pa loke ta fildeo mester apunta cu hungando como leftfielder y centerfielder, Eugene tabatin un porcentahe di fildeo di .1000 caminda el a realiza un total di 83 out sin comete error ninguno mientras cu el a duna un asistencia.

Como rightfielder caminda Eugene tambe a mira actividad, el a fildea pa un porcentahe di .959 caminda el a realiza 44 out, a comete dos error y tabatin tres asistencia.

Ta cifranan sigur interesante pa e pelotero Arubiano cu ta muestra cu e tabatin un bon temporada, despues di a perde



tempo valioso den e organizacion di Seattle Mariners.

FUTURO

San Diego Padres ta di tres organizacion pa cual Eugene Kingsale ta hunga pero ta e promer organizacion cu realmente a brinde e oportunidad pa demostra si e ta un hungador di Liga Grandi of no.

Den su periodo cu Baltimore Orioles e ekipo aki ainda tabatin

aspiracion di gana su division cu hungadornan manera Anderson, Bell y otronan y simplemente no tabatin espacio pa un novato haña suficiente tempo pa crece y transforma su mes den un hungador regular.

Despues Kingsale a ser laga den libertad pa Orioles y a ser firma pa e organizacion di Seattle Mariners cu a use como substituto pa e superestrella Hapones, Suzuki pero despues di un periodo tambe a laga e hungador Arubiano den libertad.

San Diego Padres a firma ya cu Manager Bochy tabata gusta su velocidad y kier a mira su cualidadnan di serca, y en realidad Eugene Kingsale no a decepciona su manager.

Sin embargo na lugar di usa Kingsale como habridor den e alineacion, despues di un periodo Bochy a bai over na use como sexto bate pa motibo di e forma con Eugene tabata bateando den forma consistente.

Eugene no a haña e posicion

di regular como regalo pero a lucha cu otronan manera Ron Gant y Bubba Trammell pa e puesto di regular pero finalmente el a gana e confianza di manager Bochy.

Tur cos ta muestra cu Kingsale lo haña un contrato nobo cu San Diego Padres pa proximo temporada, caminda un biaha mas e lo tin e oportunidad pa gana un posicion como regular a base di loka el a muestra ultimo lunanan cu e ekipo di Padres.